

Den carta manda pa Ministro di Asuntonan Exterior:

DEA y Consul Mericano na Antiyas a keha polisnan Hulandes

ORANJESTAD(AAN) No ta por nada servicianan di inteligencia manera DISIP, DIM y DAS di paisnan vecino, ta buscando pa loco informacion riba e forma di proceder di cierto funcionarionan policial Hulandes cu ta opera na Aruba y Antiyas y esaki DIARIO a trece padilanti e siman cu a pasa, y ata for di Hulanda ta drenta informacion, cu Merca no ta contento cu polisnan Hulandes na Antiyas.

Algun aña pasa DIARIO a adverti pa e plannan cu Hulanda tabata tin bao di mesa pa bin cu un organizacion policial na Aruba y Antiyas cu mas bien ta bay resulta den entrega di autonomia hudicial y policial na Hulanda y e famoso team di rechreche cu a ser instala na Antiyas ya caba ta den problema serio.

Combatiendo di criminalidad internacional ta algo cu mester ser haci a base di respet y reconocimiento mutuo di tur partner envolvi y esaki ta net loke no a tuma lugar den e asunto di Team special di rechreche cu a ser instala na Curacao; TST.

Loke Hulanda a manda pa Antiyas y Aruba na forza policial pa forma e team di rechreche special, tabata nada otro cu polisnan cu a sobra despues cu cuerponan policial na Hulanda a reorganiza ultimo añanan.

Pa decadanan largo esnan cu tabata bin den cuadro di ayudo tecnico di Hulanda, no tabata adapta nan mes na e situacion local na Antiyas y Aruba y tur loke tabata yiu di tera, pa nan tabata inferior na pia di trabao y den profesionalismo.

Na Antiyas e team special cu mester a yuda combati criminalidad local y internacional no ta funcionando y mas bien por bisa cu nan no ta haci net nada y cu e gran parti di dia nan ta pasa sea na laman o ta keiro y esaki ta loke DIARIO ta haya na informacion cu ta bin tanto di Hulanda como di Antiyas mes.

Algun dia pasa un carta lo a ser manda pa gobierno di Aruba caminda cu e ministro di husticia di Hulanda a laga sa cu nan no tabata tin mucho gana mas pa sigui traha den e supuesto Samenwerkingsverband policial.

Tur mandatario na Aruba a keda keto y a haci manera cu nada a pasa y ata awor e beerput ta habri y cu Merca ta manda reclama gobierno Hulandes, cu polisnan Hu-

landes na Antiyas y Aruba ta strobando trabao delicado y valioso di agentenan di DEA.

Segun informacion haya for di Hulanda, e Consul Mericano na Curacao lo a manda un carta pa ministro di Asuntonan Exterior di Hulanda y den su carta, e Consul ta cuestiona e forma di proceder di polisnan Hulandes na Antiyas.

Merca ta cualifica e polisnan Hulandes como no profesional y cu nan forma amateur y te hasta infantil di traha, ta pone bida di agentenan di DEA na peliger y esaki pa Merca ta algo inacceptable.

Si e carta aki manda pa gobierno Hulandes no ta un bom politico, anto ta con por yame anto, pasobra pa un Consul di Merca bay asina leu di manda un carta cu un contenido asina, anto ta mahos mes e barco mester a pega.

Den mundo diplomático tur hende sa cu pa un Consul na un pais manda un carta critico pa un gobierno, e mester di apoyo di su gobierno y State Department di Merca mester a aproba e carta cu e consul Mericano na Curacao a manda pa Hulanda.

Pa tur politico na Antiyas y tambe na Aruba cu tanto fanfaria a anuncia con grandi e cooperacion y con profesional e combatiendo di crimen internacional lo bay ta cu e Team special di rech-

che situa na Curacao, e carta di e Consul Mericano ta un bofta den cara y na e mesun momento e ta un mocion di desconfianza grandi pa e maneho di politiconan na Aruba, Antiyas y Hulanda.

Fuera di e carta cu a ser manda pa Hulanda, tin mas problema cu polisnan Hulandes cu a ser manda pa Aruba y Antiyas pasobra nan den nan mes ta pleita cu otro y di un banda pa otro nan ta tira culpa riba otro pa loke ta trata e forma di traha.

Un di e bruhamentonan mas formal pa e team nobo di polis tabata e hecho cu for di Hulanda na tabata kier a mantene e poder riba e polisnan Hulandes cu a ser manda pa Aruba y Antiyas y esaki den practica no tabata funciona y no lo funciona den futuro tampoco, pasobra nan mester cay directo bao di mandatarionan y autoridatnan local y no cu ta for di Hulanda ta ser dicta kico si y kico no por.

Ta pa motibo di e mal maneho aki cu tabata ser orkestra for di Hulanda, agentenan di DEA a haya nan mes den problemanan serio debi na e forma di proceder di polisnan Hulandes cu no conoce e region y e trabao policial den e area aki.

Un otro punto di discusion cu awe sigur na Aruba tambe lo bay ta e comienzo di un batata cayente

cu pronto lo bay rebenta, ta e hecho cu e polisnan Hulandes ta gana un dineral di salario y riba dje ta haya un compensacion anual di 14 mil y pico florin.

Ta con por ta cu e polisnan aki ta ser paga tanto door di gobiernonan di Antiyas y Aruba y tambe door di Hulanda y riba dje pa aña nan ta haya miles y miles di florin na compensacion?

Polisnan na Aruba no tabata tin ni papel di WC y awor ta bin resulta cu pa Jan, Piet y Kees hunto cu nan casa Truus, Miep y Toos, si tabata tin placa na granel pa nan por pasa nan dianan na laman, na barnan y te hasta den pool na cas mes?

Unda Henny y Watty ta keda awor cu nan maneho?

Ta pakico e polisnan Hulandes mester haya e compensacion pisa di 14 mil y pico florin pa aña, si nan mes ta keha cu nan no tin nada di haci?

Ta ki falta polisnan di Aruba y Antiyas cu si mester traha pa menos placa siendo cu manera a ser bisa na Antiyas, esnan cu a bin di Hulanda ta pasa mas tempo na beach y den barna nocturno cu nan tin algo di haci?

Politiciconan na Antiyas awor ta haya e culpa tira riba na lomba pasobra Hulanda ta bisa cu ta na Antiyas nan no ta percura pa e polisnan Hulandes haya suficiente

trabao pa haci y esaki a cay manera un bom na Curacao.

Manera cu cos ta pinta e team special di polis Hulandes pronto lo haya su mes ta lanta bela bay Hulanda pasobra dje forma aki sigur no por sigui traha mas.


E caso di Demei na Curacao ta fresco den memoria ainda y den e caso ey e polisnan Hulandes a pega barco formal y ultimo aki e caso di Orion Gate no ta mucho diferente tampoco, pa no papia mes di e bom cu ta den rebenta na Aruba pasobra poco poco e tapa di e beerput hudicial Hulandes na Aruba y Antiyas ta habriendo.

Y Cargo Zaak y otro casanan lo ser poni riba mesa pa asina pueblo di Aruba y Antiyas haya sa kico tabata pasando tras di cortina di e supuesto combatimento di narco trafico cu despues a bin resulta den negoshi grandi pa cierto funcionarionan policial Hulandes.

Te awe e ex PG na Aruba nunca a contradeci e critica riba su persona cu el a participa den narco trafico y un hende cu participa den narco trafico no ta un narco traficante?

Durante dianan venidero preguntanan lo ser lansa den Tweede Kamer na Hulanda caminda cu un biaha mas gobierno Hulandes lo bay tin dolor di cabez pa defende su maneho policial y hudicial den su colonianan.

MARY AWO BO A CUMPLI!!



TELEFONNAN
DI DIARIO
826747
FAX
828551